

и великие мѣста. Туто добудѣте себѣ мѣста и своимъ женам. Туто, брате, стару помолодѣть, а молодому чести добыть.

И рече князь великий Дмитрей Иванович: Господи боже мой, на тя уповахъ, да не по(л. 187 об.)стыжуся в вѣкъ, ни да посмѣют ми ся враги моя мнѣ. И помолися богу и пречистой его матери и всѣм святым его и прослезися горко и утер слезы.

И тогда аки соколы борзо полѣтели. И поскакивает князь великий Дмитрей Иванович с своими полки и со всею силою. И рече: Брате князь Владимир Андрѣевич, тут, брате, испити мѣдвяна чара, наеждаем, брате, своими полки си(л. 188)льными на рать татарь поганых.

Тогда князь великий наступает на рать силу татарскую. И гремятъ мѣчи булатные о шеломы хиновские. И поганые бусорманы покрывша главы своя руками своими. Тогда поганые борзо вся отступиша. И от великого князя Дмитрея Ивановича стези ревут, а поганые бѣжать, а русские князи и бояры и воеводы и все великое войско широкие поля (л. 188 об.) кликомъ огородиша и злечеными доспѣхами освѣтиша. Уже бо ста тур на оборонь.

Тогда князь великий Дмитрей Иванович и брат его князь Владимир Андрѣевич полки поганых вспять поворотили и нача их бусорманов бити и сечи горазно без милости. И князи ихъ падоша съ коней, загремѣли, а трупми татарскими поля насаяша и кровию ихъ реки протекли. Туто поганые (л. 189) разлучишася розно и побѣгше неуготованными дорогами в лукоморье, скрегчюще зубами своими, доруши лица своя, аркуще так: Уже нам, брате, в земли своей не бывать и дѣтей своих не видать, а в Русь ратю нам не хаживать, а выхода нам у русских людей не прашивать. Уже бо востона земля татарская, бѣдами и тугою покрывша бо сердца их, хотение князем и похвала Ру(л. 189 об.)ской земли ходити. Уже бо веселие наше поничѣ. Уже бо русские сынове разграбиша татарские узорочья и доспѣхи и кони и волю и верблуды и вино и сахар и дорогое узорочие. Уже жены русские восплескаша татарским златом.

Уже бо по Руской земле простресе веселие и буйство. Воснесесе слава руская по всей земли, а на поганых татар промчесе злых бусорманов хула и пагуба. (л. 190) Уже бо вержено диво на земли. И уже грозы великого князя Дмитрея Ивановича и брата его князя Владимира Андрѣевича по всем землям текутъ грозы. И князь великий своею храбростию и дружиною Мамай поганого побил за землю за Рускую и за вѣру крещеную. Уже поганые оружия своя повергоша на землю, а главы своя подклониша под мечи руские. И трубы их не трубят и уны(л. 190 об.)ша гласи их.

И отскоца поганый Мамай от своя дружины серым волком взвыл, и притече к Хафѣсте граду. Молвяше же ему фрязове: Чему ты, поганый Мамай, посягаешъ на Рускую землю? То ты била орда Залѣская. А не бывати тобѣ в Батыя царя. У Батыя царя было четьреста тысячь окованные рати, а воевал всю Рускую землю от востока и до запада. А казнил бог Рускую землю (л. 191) за своя согрѣшения. И ты пришел